



Inatsisartunut ilaasortaq  
Hans Aronsen  
Maani/

**Ittoqqortoormiit eqqaani qaleralinniarneq pillugu § 37 naapertorlugu apeqqummut nr. 176-imut akissut**

Inatsisartut suleriaasianni § 37, imm. 1 naapertorlugu Ittoqqortoormiit eqqaani qaleralinniarneq pillugu Naalakkersuisunut apeqquteqarsimavutit. Apeqqut suliaasaqarfigisannit akineqartussanngorlugu innersuunneqarpoq.

**1. Siunissami Ittoqqortoormiit eqqaanni qaleralinniarnep ineriartortinnissaanut suliniutit, Tasiilap eqqaani kitaanilu qaleralinniaqataaneq Ittoqqortoormiini piniartunut inuusuttunullu aalisariaatsimik tassannga ilinniartitsinissamut periarfissatut isigineqarpa?**

Aalisariaatsinik pineqartunik amerlanerusut piginnaasaqalernissaat siunertaralugu aalisartunit misilittagaqarluartunit illoqarfinnit allaneersuniit ilinniartitsisoqarluni piginnaanngorsaasarneq periarfissatut pitsaasutut Naalakkersuisunit isigineqarpoq. Periarfissarlu taanna atugaalereernikuuvoq.

Inatsisatut 2021-imut Aningaasanut Inatsit aqutigalugu 1 mio. kr.-inik aningaasaliisuteqarnikuupput Tunumi, Qaanaami Qimusseriarsuarmilu aalisarnerup ineriartortinnegarnissaanut. Suliniutip aallaaserineqareerneratigut missingersuutissatullu siunnersuuteqartoqareerneratigut aningaasat pineqartut suliniutinut aningaasaliissutigineqarsinnaalersarput.

Suliniutissat ilaat aningaasaliiffigineqartut tassaapput aalisartut marluk Kuummiuneersut bundgarnersornermik Nuummi aalisartunit ilinniartinneqarneri, tassani bundgarninik ningitsisarneq aalisartarnerlu pikkorissartitsissutigineqarlutik.

Suliniut alla 2021-mi Ittoqqortoormiini aningaasaliiffigineqartoq aamma aalisarnermik ineriartortitseqataasussa q tassaaavoq aalisartut piniartullu pingasut Ittoqqortoormiineersut atorussarsiuunneqarnissaat taamaasillutik Ittoqqortoormiit Kangerluini qaleralinnik misileraallutik aalisarsinnaalernissaat siunertaralugu.

Naalakkersuisunut pingaaruteqarpoq Kalaallit Nunaat tamakkerlugu aalisarnerup ineriartortittuarnissaata qulakkeerneqarnissaa, taamaattumillu ingerlaavartumik qulaani taaneqartut ineriartornermik suliniutit assigiinngitsut suliarineqartarput. Pingaaruteqarporli suliniutit aalisartunit namminneq ingerlanneqartarnissaat, tamatumani iluanaarutit anner-tunerpaaffissaaniitinniarlugit.

Ulloq: 14-12-2021  
Suliat normua: 2021 - 21731  
All. nr. 18720543  
Postboks 269  
3900 Nuuk  
Oqarasuaat (+299) 34 50 00  
Fax (+299) 34 63 55  
E-mail: apn@nanoq.gl  
www.naalakkersuisut.gl

**2. Maannangaaq Kalaallit Nunaata Kangiata avannarpasissuani Ittoqqortoormiit eqqaanni aalisarnermik ineriartortitsineq siuarsarniarlugu umiarsuarmik tunitsiviliisoqarsinnaaneranik misissuinissamik pilersaaruteqartoqarpa?**

Inuussutissarsiuteqartut qinnuteqareernerisigut Naalakkersuisut aatsaat umiarsuarmik tunitsiviliinissamut akuersissuteqartarput.

Aalisarluarnerup nalaanni nunami tunisassiorfiit malinnaasinnaajunnaarsillugit imaluunniit ingerlatseqatigiiffik qinnuteqartoq piffissami pineqartumi nunami tunisassiorfiutiminik iluarsartuussinerata nutaamilluunniit tunisassiorfiliornerata nalaanni aalisakkat tulaaneqartartut suussusaat apeqqutaatillugit aatsaat umiarsuarmik tunitsiviliinissamik akuersissuteqartoqartarpoq.

Naalakkersuisut umiarsuarmik tunitsiviliineq ajorput aammalu qinnuteqaativimmik tigu-saqarsimasoqartinnagu umiarsuarmik tunitsiviliinissamut periarfissamik misissuinissamut Naalakkersuisut pilersaaruteqanngillat. Naalakkersuisulli qilanaarissavaat umiarsualeerusuttut soqutiginnittut qinnuteqaateqarsinnaanissaat.

Inussiarnersumik inuulluaqqusillunga

  
Aqqaluaq B. Egede  
Aalisarnermut Piniarnermullu Naalakkersuisoq